



La primavera carmala ils motociclists da far excursiuns pli extendidas.

FOTO ROLF CANAL

Damain accidents da motos

Ina campagna, in di d'acziun, in num, ina finamira

■ (cc) «Smart rider – pensa pli svelto che quai che ti charras.» Sut quest titel stattan tant la nova campagna da prevenziun cunter accidents da motos che vegn lantschada da la polizia chantunala dal Grischun sco er il nov Smart Rider Day, fin ussa il Biker Prävi Day, en il center per la segirezza stradala Driving Graubünden a Cazas. La nova campagna è vegnida preschenta da la gievgia avantmezdi da la polizia chantunala dal Grischun a Cazas.

La campagna ch'è vegnida sviluppada en stretga collavuraziun cun l'agentura da reclama da Cuiira CLUS ScRL, vegn accompagnada da placats, d'affischas en ils posts da servetsch, da fegls sgulants, d'inserats e cunzunt er da la nova pagina d'internet www.smart-rider.ch. Er per il di d'acziun Smart Rider Day dals 26 da matg 2013 datti in'atgna pagina d'internet cun tut las infurmaziuns (www.smart-rider-day.ch). Ultra da quai è la campagna preschenta er en il Facebook.

La prevenziun è ina incumbensa legala

«La prevenziun è ina chausa impurtanta per la regenza grischuna», accentuescha il cusseglier guvernativ *Christian Rathgeb*, schef dal departament da giustia, segirezza e sanadad dal Grischun. En gene-

ral possia la noziun «prevenziun» vegnir transladata cun «evitar problems tras precauziun», di Rathgeb plinavant. «Jau sun perquai zunt led che la polizia chantunala dal Grischun presta lavur da pionier sin quest champ e fa ina tala prevenziun cumplexiva per la gruppa en mira da las motociclistas e dals motociclists.» Per *Hansjürg Frehner*, schef da la polizia da traffic dal Grischun, sa deducescha l'incumbensa preventiva gia da la lescha. «L'incumbensa legala n'è betg mo quella da perseguir delicts e cuntravenziuns ch'èn vegnids enconuschents, mabain d'impedir quels avant ch'els naschan cun tut ils meds che stattan a disposiziun», declera Frehner. Per consequenza saja la segirezza en il traffic sin via ina sfida permanente, impurtanta ed indispensabla per la polizia. «La lavur da publicitad e da prevenziun demussa per l'ina metoda ch'èn sa cumprovada e per l'otra metoda innovativas che servan a far attent las motociclistas ed ils motociclists als privels da chaschunar in accident», di Frehner plinavant. En spezial èn quai las controllas preventivas da rutina, ils dis da prevenziun sin las vias dals pass ed il Smart Rider Day dals 26 da matg 2013.

Percurs d'inschign, Chris Rid ed anghel Franky al Smart Rider Day

Il percurs d'inschign, en il qual vegnan

eruids ils smart riders da l'onn 2013 en trais categorias, è er quest onn puspè il punct central da l'occurrentza. Annunzias per quest percurs pon vegnir fatgas a partir d'immediat online sut www.smart-rider-day.ch Ina vita sin duas rodas – betg adina cun tuttas duas sin terra, dentant er betg dal tutfatg deteradas: Quai è Chris Rid, stunt-rider da Markdorf al Lai da Constanza en Germania. Durant il Smart Rider Day mussa el ina da sias shows las pli impressiunantas che po segiramain vegnir validada sco in ulteriur punct culminant da l'occurrentza da quest onn. L'anghel Franky ch'è enconuschent da la reclama a la televisiun vegn er ad esser da la partida al Smart Rider Day. En ses costum dad anghel gia quasi legendar vegn el a sa laschar fotografar cun las participantas e cun ils participants sco er cun ils giasts. Preschentas èn er puspè la Rega ed il salvament da Cuiira che dattan ina invista da lur lavur. En il vehichel ch'è vegnì preparà aposta datti er la pussaivladad da dar sang. Las novaziuns sin il martgà da motos vegnan preschentas da tshintg fatschentas da motos che derivan da l'entira Svizra orientala. La polizia chantunala dal Grischun tgira ultra da quai puspè in stan d'infurmaziun davart il tema prevenziun e mussa ils meds d'acziun tecnicos che vegnan duvrads en il mintgadi.